

stido d'oro, *solum* sier Francesco Capelo, qual havia una veste d'oro soto uno manto di damaschin cremexin e una catena d'oro al colo. Il resto di patricii di seda et di scarlato; e cussi fo compita.

*Dil provedador Capello, le letere venute eri sera fu di 7, a hore 22, a la Cavaliera in campo felicissimo.* Come eri sera, partiti di Ponte Vicho, zonseno parte li, zoè italiani e sguizari, a San Martin vicini a Cremona mia 5, et erano su li acordi di Cremona, qual sguizari la volevano a sacho. Ozi li castelli dil cremonese sono venuti soto la Signoria nostra, zoè Castel Lion e altri lochi. *Etiam* li lochi di Geradada veneno a dar ubidentia; spera Crema e Bergamo con i loro teritori; e solcita si mandi li danari per li sguizari, *aliter* intravegnirà qualche inconveniente et sinistro. *Item*, a la Signoria scrive che il vescovo de Ixernia orator pontificio et il Bataion colateral zeneral nostro havia concluso il taion con cremonesi in ducati 40 milia, et zà ne haveano auti 7000, et doman ariano 5000; il resto con qualche tempizelo li daria. Et come erano pochi cittadini principali, per esser partiti con le loro fameglie e andate, parte a Milan, parte di là di Po. *Item*, come havendo inteso che Crema si daria a la Signoria, havia subito expedito Zuan Paolo di Sant'Anzolo condutier nostro fiol di missier Anzolo da Sant'Anzolo cremasco, qual è a Milan per sospeto, con segurtà (*dì*) non si partir, et con lui anderà 1500 homeni d'arme et . . . fanti, quali sperano intrerano in la terra. *Item*, che a Bergamo è 200 lanze fiorentine, capo uno Savello, et come il capitano di le fantarie signor Renzo da Zere et il signor Virginio Orsini condutieri nostri, quali sono so' parenti, erano venuti da lui a dimandarli salvoconduto per ditte zente di andar via a Fiorenza; el qual provedador non havia voluto farli. *Item*, che li ditti andono dal cardinal sedunense legato, dal qual ebene dito salvoconduto; et inteso, lui provedador andò dal cardinal dicendo dite zente non poleno fuzer di esser svalizate, *adeo* il cardinal ritene dito salvoconduto. *Item*, come ha aviso la compagnia dil gran scudier, era di là da Po da' villani stà svalizata, et in Cremona è fama che Bologna habi fato mutation, retenuo i Bentivoy e levà le insegne dil Papa. *Item*, scrive che il cardinal voleva far levar in Cremona le insegne di la Liga, nè li à valso raxon habbi dito esso provedador, et dil brieve dil Papa che le terre nostre è di la Signoria. *Item*, par sia intrato in Cremona el vescovo di Lodi, fo fiol natural dil ducha Galeazo Maria Sforza, qual andò col cardinal in campo et fecese cridar a li soi: *Ducha, Ducha!* e

alcuni pochi cremonesi eridono: *Ducha, Ducha!* ma la più parte eridava: *Marco, Marco!* Solcita esso provedador li danari di sguizari e di le zente nostre. Francesi sono zonti a Pizigaton; si dice anderano verso Alexandria di la Paia etc.

*Di domino Piero Antonio Bataia colateral zeneral nostro, date in Cremona a dì 7, hore ..., a la Signoria nostra.* Dil modo de l'intrar in la terra, e il taion dato di ducati 30 milia è zà scosso bona parte di danari, *ut in litteris*, et si va scodando. Et venuto a la piazza con l'orator dil Papa, domino Lunardo Bota usoe alcune parole, ringratiando Dio esser ritornati soto San Marco etc. *Item*, è nova che Bologna havia retenuo li Bentivoy e datosi al Papa. *Item*, come in castello di Cremona è fanti 350, e quel castelan è bon compagno e amico di uno citadin, e sperano averla et darli etc.; *cum* altre particolarità zereha levar le insegne, *ut in litteris*; qual finora non era stà levà insegna alcuna.

*Dil provedador Capello zeneral, date pur a la Cavaliera a dì 8, hore 19, zonte questa mattina.* Come ozi il reverendissimo cardinal era intrato in Cremona con alcuni suoi senza averli dito cossa alcuna, e tolto il possesso di quella a nome di la Liga. Li sguizari erano levati e andati alozar in la villa di Paderno, lontan di lo alozamento dove erano mia 5, e verso Pizigaton. Scrive lui provedador à ordinato sia fato el ponte sopra Po per poter passar e andar a Parma e Piazenza, e da mattina esso provedador con il nostro campo italiano si leverà de dove i sono e anderano verso il ponte; el qual ponte sopra Po si fa di là da Cremona. Francesi tutti sono passati di là di Ada e stanno cussi fermi. Anno mandato explorator per saper il progresso loro, e secondo i farano, cussi nostri si governerano. Replica li danari per sguizari, *aliter* seguirà qualche gran scandolo, et sono essi sguizari da numero 20 milia e più. *Item*, di le zente andò a Crema, non à nulla; judicha non habino fato alcuna cossa, chè zà l'aria inteso.

Da poi disnar, fu Pregadi et leto le letere di 170 campo, *ut supra*.

Fu posto, per i savii, elezer *de præsenti* 3 provedadori executori in campo con ducati 50 al mexe per spexe, menì 5 cavali et 5 famegii con pena ducati 500, partino *immediate*. Et presa la dita, fu fato il scurtinio con boletini e tolti questi: